

FARIE TEATRÂL

I "Siums" di Gigi Dall'Aglio a vierzin il Mittelfest 2012

Si clame *Siums* il secont spetacul di produzion de *Farie teatrâl furlane*, che al ven dopo dal sucès dal an passât di *Pieri da Brazzaville*, dedicât al grant esploradôr furlan di fin Votcent.

Il spetacul di Gigi Dall'Aglio al vignarà presentât vuê a Palaç Belgrât a Udin, in ocasion de prossime prime assolude a *Mittelfest* (ai 14 di Lui al teatri Ristori di Cividât) in presince dal regjist, dal assessôr regionâl ae culture Elio De Anna, di chel provinciâl Elena Lizzi, e dai presidents di Arlef, Loren-

zo Zanon, di *Mittelfest*, Antonio Devetag, e di Coss, Alberto Bevilacqua.

E continue cussì la esperience de *Farie*, che e à in cûr sore dut di rinfuarçâ e di dâ continuitât ae produzion di tescj e di spetacui teatrâi professionâi in marilenghe, metint adun cutuardis ents, daûr de iniziative de Provincie di Udin. La Agenzie regionâl pe lenghe furlane e je il pont di incuintri par cheste cuardade, che si cjate tal proget par promovi il ringuviment de sene teatrâl in lenghe furlane. Un proget in-

viât par integrâ *il savê fâ* di ognidun, savint che tal teritori a son artiscj, interpretis, operadôrs teatrâi cun capacifâts cetant buinis, che a àn bisugne dome di une azion di produzion cun caratar di continuitât, di promovi ancje fûr regjon.

Stant che si fevele di un teatri cun riferiment specific ae lenghe furlane, si à di impegnâsi tal lavôr di dramaturgie e, par chel che al inten invezit la produzion e la distribuzion dai spetacui, si à di fâ riferiment aes vocazions dai ents e



I partecipants ae prime *Farie* teatrâl dedicade a "Pieri di Brazzaville"

des personis che a son part dal acuardi de *Farie*: ents cuntune pratiche confermade te produzion, te organizazion di events, te distribuzion teritoriâl, tal studi, te didatiche, e personis di esperience teatrâl internazionâl e altris che a puartin cun lôr il risultât di interes culturâl difarents. A chest si à di

zontâ il jutori fundamentâl di une rêt di atôrs, di companis, di cjantants e di musiciscj cuntune grande cognossince dal teritori, cuntune grande competence e preparazion professionâl, che di cheste istituzion a àn il vantaç di vê a disposizion une risultive di esercizi e di lavôr simpri vierite.